

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

Thursday, April 30, 2026

Time - 2:30pm - 2:35pm



HPCD LAYING OF ARMS

Hmar People's Convention - Democratic (Lalhmingthanga Sanate's Faction) te chuan vawiin hian CTI, Sesawngah silai an tung a, silai tun inkhawm Laying of Arms Ceremony hi Chief Minister Pu Lalduhoma hovin neih a ni a, an inremna tih famkim nan ralthuam hi an hlan a ni.

Mizoram sorkar leh Hmar People's Convention - Democratic (Lalhmingthanga Sanate's Faction) te chuan tun thla ni 14 khan Sakawrdai Vengpui Community Hall-ah inremna thuthlung, Memorandum of Settlement an ziak a; inremna ziahna hun hmanpuitu Adviser to Chief Minister (Political) Pu Lalmuanpuia Punte, MLA chuan Mizoramah hnam bil hel an awm tawh loa a hriat thu a sawi.

Silai tun inkhawmah hian HPCD President Pu Lalhmingthanga Sanate chuan thusawiin, Mizoram hmar leh hmar chhak lam chu ngaihsak an tul tih sorkar ah an tilang ve a, amah erawh chu an tihlan dan erawh chu mi zawng zawng hriatthiam zawng ani lem lo a, a lawmawm lemloh tih pawh an pha lo tih sawiin, kum 23 hnuah Mizoram sorkar a bik takin tuna Chief Minister hnar kaihna hnuaiiah inbiaiin, inremna thuthlung an siam a, he inremnaah hian an duh zawng zawng a kim vek lo a amaherawh chu kalphung thar Mizoram sorkar ah an lengin an hria a, an mipuite, anmahni thlawp tute leh duhsaktute avangin an lo chhuak a ni a ti.

Sorkar lam an inhawng hle a an hriatthu sawiin, Manipur lama hnam buaina a chhuah pawhin, an unaute harsatna hre rengin hchawp leh chilhin Tuivai leil an dawh sak a, Mauchar khua leh Neepco inkar kawng chhe em em loh theih loh a zawh tul si pawh emergency a siam dan kawng an dapsak a, chu chu an mipuiten an hrevek a chuvangin anni sorkar thar chu belh tlak an ni tiin luhchilh a thawk ho turin an ringngam a ni a ti.

Home Minister Pu K Sapdanga chuan thusawiin Mizoram chanchin ziahna a pawimawh leh langsar tak a ni a ti a, anmahni chauh ni loin an nu leh pa, an fate thlamuang taka an awm theihna tur a an lo haw chu lawmawm a tih thu a sawi a. Remna a lo awm theih chhan langsar tak chu remna duhtu ram hruaitu Chief Minister an neih vang a ni a ti a, Mizoram mipui ten remna a awm theih nana nasa taka hma lo la tawh a nih avangin 'Symbol of Peace' tia koh ngam a ni a ti.

Tunah chuan ralthuam hian leka an duh ti hlawhtlinna tur kawng an zawh chhan ti hlawhtling turin, anmahni chauh a thawk loin Mizoram sorkar nenkan thawkho thei dawn ta tihna a ni, a ti bawk.

Mizoram chhunga ralthuam keng chi bil hel pawl la awm chhun nia hriat HPC-D (LF) te hi 2024 kum laihawl atangin a dawr tan a, Sept ni 20, 2024 khan Silchar Mizoram House ah inbiakna hmasa ber neih a ni a, boruak tha tak hnuaiiah inthlahliam a ni. A kum leh Oct ni 10, 2025 ah Assembly Speaker Pu Lalbiakzama pisaah inbiak vawi 2-na neih a ni a, hetah hian an thil phut (charter of demand) an pharh a, tha takin sawiho a ni. Hemi hnu hian Home Minister kaihhruai Committee lian din a ni a, Oct ni 28, 2025 khan thutkhawm a ni a, inbiakna neih tawh dan

thirho niin HPC-D (LF) te demand sawiho a nih bakah Mizoram sawrkar duhdan te sawifel a ni.

December ni 1, 2025 khan Aijal Club-ah inbiak vawi 3-na neih leh a ni a, Mizoram sorkar duhdan te hrilhhriat an ni a, December ni 2, 2025 ah HPC-D (LF) te hian Mizoram sorkar duhdan an pawm thu leh anmahni lam thil phut thenkhat ziakin Home Department ah an thlen a, official level ah indawr chhonzawm zel niin, kumin March ni 30, ah Adviser to CM (Political) Pu Lalmuanpuia Punte pisaah inbiakna hnuhnung ber neih a ni a, engkim a tul tur ang ang sawiho niin tun thla April ni 9 khan Home Minister hova official pawimawh kalkhawmtan an thirho hnuah ruahmanna siam a ni a, April ni 14 khan inremna ziahfel a ni thei ta a ni.



SAITUAL YMA SUB HQRS

Ni 3 awh Saitual YMA Sub-Headquarters Inkhawmpui vawi 3-na chu “Ruihhlo do” tih thupui hmangin Lal Hrangchhuana Run, NE Khawdungseiah neih a ni a, nizan khan Minister of State Pu B. Lalchhanzovan a hmanpui.

He hunah hian Minister Pu B. Lalchhanzova chuan thu a sawi a, NE Khawdungsei panna kawng chu tha a tih thu a sawi a, ram hmasawna hmel hmua a inhriat thu a sawi baw.

YMA chu Mizo hnam phuar khawmtu leh hnam lungphum pawimawh tak a ni, a ti a, he inkhawmpuia hian Saitual District-a YMA member te inpumkhatna leh tanrualna a lang chiang hle a ti a. YMA chu ramngaw, nungcha leh lui humhalh kawngah pawh hma lain, khawtlang nuna thil tha lo, ruihhlo leh eirukna do kawngah pawh theih tawp an chhuah thin tih a sawi a, YMA chu chhawm nung zel turin kalkhawmte chu a fuih nghal baw a ni.

Minister chuan thalaite chu an taksate ruihhlo bawiha pe lo tur leh mahni inkhawngaihna dah thaa hma lam pen zel turin a fuih baw a ni.

YMA Sub-Headquarters inkhawmpui hi SYMA President Pu R. Lalruatkiman a kaihuai a, Conservator of Forest Pu Lalnunsanga Khawlhriing chuan ramngaw humhalh pawimawh zia a sawi a. Ruihhlo donaa ti tha leh ramngaw leh nungcha humhalh kawnga ti tha YMA Branch te hnenah lawmman pek nghal a ni baw.

NE Khawdungseia YMA Sub-Headquarters Saitual Inkhawmpui hi vawiin thleng neih tur a ni a, he inkhawmpuia hian vantlang inkhawm, rorel inkhawm, hruaitu inthlan leh cultural programme te neih a ni dawn a ni.

